

26 NOV 1999

UIA

SEJARAH PENUBUHAN UIA DIPUTAR BELIT, KATA BEKAS TIMBALAN REKTOR

KUALA LUMPUR, 26 Nov (Bernama) -- Bekas Timbalan Rektor Universiti Islam Antarabangsa (UIA) Profesor Datuk Dr Ariffin Suhaimi meminta semua pihak agar tidak memutar belitkan sejarah penubuhan universiti itu bagi kepentingan politik masing-masing.

Beliau berkata penubuhan UIA adalah ilham Perdana Menteri Datuk Seri Dr Mahathir Mohamad yang telah mencadangkan penubuhannya di Emiriyah Arab Bersatu semasa lawatan rasmi ke Asia Barat pada Januari 1982.

"Fakta di atas perlu saya jelaskan kerana ada pihak yang memutarbelitkan sejarah penubuhan UIA (dengan menyatakan bahawa ia) sebagai hasil usaha dan ilham Datuk Seri Anwar Ibrahim," katanya dalam satu kenyataan di sini hari ini.

Ariffin berkata kertas cadangan terperinci penubuhan universiti itu telah disediakan oleh Kementerian Pendidikan yang ketika itu diterajui oleh Datuk Amar Dr Sulaiman Daud.

"Saya telah dilantik sebagai projek-koordinator untuk penubuhan universiti itu pada April 1982 dan tugas ini telah saya lakukan di bawah arahan Dr Sulaiman," katanya.

UIA telah ditubuhkan secara rasmi pada 20 Mei 1983. Rektornya yang pertama ialah Muhammad M. Abdul Rauf.

Menurutnya, Anwar hanya terlibat secara langsung dengan UIA apabila beliau dilantik sebagai Presiden universiti itu pada 1988 bagi menggantikan alahyarham Tun Hussein Onn.

Beliau berkata Anwar selepas itu telah melantik sahabatnya Dr AbdulHamid AbuSulayman, seorang warganegara Arab Saudi yang menetap di Washington, Amerika Syarikat sebagai Rektor UIA.

"Di bawah pentadbiran Rektor ini (Dr AbdulHamid), pelaksanaan konsep pendidikan Islam menjadi kabur dan diketepikan," katanya.

Menurut beliau, konsep pendidikan yang dianjurkan oleh Dr AbdulHamid ialah "Intellectualization of Islam" iaitu satu konsep yang bercanggah dengan falsafah asal universiti berkenaan.

"Pada hemah saya konsep "Intellectualization of Islam" ini adalah konsep "Westernization of Islam" dan, jika ada orang yang bertanggungjawab memesongkan dasar falsafah UIA, (dia) ialah Datuk Seri Anwar Ibrahim melalui sahabatnya Dr AbdulHamid," katanya.

Beliau berharap pentadbiran UIA yang baru selepas ini akan berusaha meletakkan kembali UIA kepada dasar falasafahnya yang asal seperti dicadangkan oleh Dr Mahathir.

Dr AbdulHamid yang meletak jawatan pada tahun ini telah digantikan oleh seorang rakyat Malaysia iaitu Prof Dr Mohd Kamal Hassan.

Jawatan Anwar sebagai Presiden UIA juga telah diambil alih oleh Menteri Pendidikan Datuk Seri Najib Tun Razak.

--BERNAMA

NY MAI